

2 JUAN

Marí ke Juan wakára'aka pajluwájarujlo puráka'aloji

¹Kaja phíyu'uke cha nuká, wakára'ari pijló marí puráka'aloji, piyánijlo wa'até. Tupana ja'apiyá jema'ajeño nakiyana iká pajñakani nujwa'até, ñakele íki'ija nuwátaka iká. Unká nukaja kalé wátari íki'ija iká; ñaké kaja ajopana, kewákaje puráka'aloji nakojé we'epéjeño nakiyana, wátaka iká íki'ija. ²Íki'ija nuwátaka iká, rejenowaja we'emakale ijwa'até kewákaje puráka'aloji ja'apiyá. Kaja keja we'emajika ra'apiyá matajnako. ³Nuwata wara'apá Tupana, Ri'irí wa'até, la'aká inaku palá, i'imakáloje palá penaje. Kewákaje puráka'aloji chuwá nuwata ri'imaká ijló ñaké, íki'ija Tupana wátakarena i'imakale.

⁴Pu'ují nupechu, nuwe'epíkale piyani nakiyana a'aká nanakojó kewákaje puráka'aloji, raú nala'á wara'apá Tupana wakára'aka ke. ⁵Nojena, mawó numaká ijló, iwátakaloje pekowáaka íki'ija. Unká wajé kalé ñaké la'akana numá nakú ijló; kaja keja Tupana wakára'aka wala'aká, wakeño'oká ra'apiyá jema'akana i'imaká eyá wakajé. ⁶Iná wátakachu íki'ija Tupana, iná la'á Ripuráka'alo kemaká ke. Ikeño'oká ra'apiyá jema'akana wakajé, iwe'epí mékeka riwakára'aka weká, wawátakaloje íki'ija pekowáaka penaje.

Pajlákachina yukuna marí

⁷Re kajrú pajlákachina marí eja'awá chu, unká na'alá nanakojó Jesucristo yukuna. Apo'ojó napura'akó rinaku, nemá: “Ri'imaká marí eja'awá chu wakajé, unká ina'uké ke kalé ri'imaká, weká ke”, ke nemaká. Pajlákachina ilé ke kemakaño, chapú napechu Jesucristo nakú. ⁸A'aniña ilé kajena puráka'alo inakojó, napichátaka piyá ijló kewákaje puráka'aloji, kaja palá la'akana nakuja iká. Ilé ke ila'akale, palá nakaje i'imajika ijló je'echú chu.

⁹Apala pajluwa ka'ajná i'imari Tupana yukuna ina'ukejlo. Unká Jesucristo puráka'alo chuwá kalé ka'ajná ri'imá riyukuna najló, raú iná we'epí unká ripechu i'imalá Tupana pechu chuwá.

Eyá i'iwapataro Jesucristo puráka'alo cha pechu, Jesucristo pechu chuwá; Tupana pechu chuwá kaja ripechu. ¹⁰Apala apú ka'ajná iphájeri inaku. Unká ka'ajná rewíña'atalaje iká nakaje nakú, Jesucristo jewíña'ataka rinaku ke kaja. Iyuríniña ilé kaje mujlúka'aka iñakaré chojé, rewíña'atakaloje iká penaje. Imaniña kaja rijló: “Eko Tupana la'á piká palá”, ke. ¹¹Ilé ke imájika ee rijló, a'ajé riñathé nakaje unká kewákaje kalé jewíña'atakana nakú aú.

Kaja penaje Juan kemakare nakú marí

¹²Re kajrú nakaje nuwata nakú kemakana ijló, e'iyonaja unká nuwátala rilana'akana me'etení. Nuwata ichaje i'ijnakana. Riwakajé nupura'ajó ijwa'até rinaku, raú pu'ují wapechu i'imakáloje.

¹³Wanakiyana maare i'imakaño kemaño kaja inaku: “Eko palá najló ka'ajno”, ke.

Kaja.